

CONVENIO DE COLABORACIÓN ENTRE A CONSELLERÍA DE SANIDADE, O SERVIZO GALEGO DE SAÚDE E DOMINIO DE BALBOA SL, PARA A ORGANIZACIÓN DA PRESTACIÓN FARMACÉUTICA NA RESIDENCIA XERIÁTRICA SAN COSME.

En Santiago de Compostela, a 18 de maio de 2018

REUNIDOS

Dunha parte, don Jesús Vázquez Almuiña, conselleiro de Sanidade e Presidente do Servizo Galego de Saúde, de acordo co establecido no artigo 34 da Lei 1/1983, do 22 de febreiro, de normas reguladoras da Xunta e da súa Presidencia, e cos Decretos 41/2013 e 43/2013, do 21 de febreiro, polos que se establecen as estruturas orgánicas da Consellería de Sanidade e do Servizo Galego de Saúde; de conformidade co establecido na Lei 1/2016, do 18 de xaneiro, de transparencia e bo goberno, e na Lei 40/2015, de 1 de outubro, de Réxime Xurídico do Sector Público.

Doutra, dona Lara Fidalgo Sánchez, en representación de DOMINIO DE BALBOA, SL con CIF: B24528911 e domicilio en Rúa Segadores, nº1, 32310 Rubiá (Ourense), en calidade de representante da dita entidade, segundo consta na escritura notarial con número de protocolo 1770, de 19 de decembro de 2014, outorgada perante a don Rogelio Pacios Yañez, Notario do Ilustre Colexio de Castela e León.

MANIFESTAMOS:

1. Que a Consellería de Sanidade a través do Servizo Galego de Saúde é responsable da prestación farmacéutica aos seus usuarios, de conformidade co disposto no artigo 94 da Lei 8/2008, do 10 de xullo, de saúde de Galicia, e no artigo 2 da Lei 5/1999, do 21 de maio, de ordenación farmacéutica.
2. Que a entidade DOMINIO DE BALBOA, SL, conforme ao disposto no artigo 4 do Decreto 254/2011, do 23 de decembro, polo que se regula o réxime de rexistro, autorización, acreditación e inspección de servizos sociais en Galicia, é unha entidade prestadora de servizos sociais, titular da RESIDENCIA XERIÁTRICA SAN COSME, e

como tal está inscrita no Rexistro Único de Entidades Prestadoras de Servizos Sociais da Consellería de Traballo e Benestar co número de rexistro E2148C001.

3. O programa de atención farmacéutica nos centros de servizos sociais fundaméntase no disposto no artigo 31.2 da Lei 5/1999, do 21 de maio, de ordenación farmacéutica de Galicia, segundo o cal resulta obrigatorio o establecemento dun servizo de farmacia propio nos centros de asistencia social que teñen 100 camas ou máis en réxime de asistidos. Este precepto posibilita ademais que a consellería responsable en materia de prestación farmacéutica estableza convenios ou acordos con estes centros co fin de asegurar unha mellora na xestión da prestación farmacéutica, tanto dende o punto de vista da seguridade no manexo de produtos farmacéuticos como no da racionalización do seu gasto.

Dende o ano 1998 moitos dos centros de servizos sociais e os hospitais de referencia da área sanitaria na que se ubican veñen colaborando co fin de garantir a cobertura das necesidades farmacoterapéuticas dos usuarios residentes nestes centros, de xeito que o hospital de referencia convértese en provedor dos medicamentos e produtos sanitarios financiados que precisen eses residentes.

Nos centros nos que aínda non está implantado o programa de atención farmacéutica, os usuarios obteñen os recursos terapéuticos que forman parte da prestación farmacéutica a través da súa prescrición, receita médica oficial e posterior dispensación na oficina de farmacia, sendo financiados polo Servizo Galego de Saúde.

Este sistema de prestación de atención farmacéutica dende o hospital de referencia aos usuarios do centro de servizos sociais supón tanto un beneficio asistencial para os pacientes, posto que o seguimento da súa farmacoterapia realízase de forma individualizada baixo a responsabilidade dun farmacéutico dos centros asistenciais do Servizo Galego de Saúde, como unha garantía para acadar unha xestión máis eficiente dos recursos farmacoterapéuticos.

4. As principais características desta prestación son polo tanto a cobertura farmacoterapéutica por parte do Servizo Galego de Saúde e a subministración dos medicamentos e produtos sanitarios polo hospital de referencia, de xeito que a terapéutica do centro se adecúa á Guía Farmacoterapéutica do hospital de referencia,

o que propicia unha farmacoterapia integrada, coordinada e con igual custo e calidade que a do hospital.

5. Ámbalas dúas partes recoñecen polo tanto a necesidade de asegurar que a calidade da prestación farmacéutica que reciban os usuarios do sistema que se atopen na RESIDENCIA XERIÁTRICA SAN COSME sexa equiparable á que recibe calquera outro usuario do Sistema Sanitario Público Galego, mediante o establecemento de mecanismos que faciliten o acceso a aquelas prestacións, consonte ao establecido no *Real Decreto Legislativo 1/2015, de 24 de julio, por el que se aprueba el texto refundido de la Ley de garantías y uso racional de los medicamentos y productos sanitarios*, e proporcionen unha mellora da calidade da atención prestada aos usuarios, acadando a súa atención integral e unha utilización eficiente dos recursos.

6. Que, sen prexuízo das obrigas legais establecidas, as partes asinantes, consideran de interese establecer mecanismos e canles de colaboración que o posibiliten.

Por todo isto, formalizan o presente convenio de colaboración, de acordo coas seguintes

CLÁUSULAS

Primeira. Obxecto

O presente convenio ten por obxecto que a prestación farmacéutica aos usuarios do Servizo Galego de Saúde residentes na RESIDENCIA XERIÁTRICA SAN COSME, se realice de xeito eficaz, eficiente, integrado e coordinado cos outros niveis asistenciais, tendo en conta o establecido na Lei 5/1999, do 21 de maio, de ordenación farmacéutica.

Segunda. Obxectivos específicos

Para os efectos do determinado anteriormente, as partes axustarán a súa actividade á consecución dos obxectivos seguintes:

1. Garantir unha prescrición médica acorde aos criterios das guías farmacoterapéuticas dos centros asistenciais de referencia.
2. Proporcionar unha adecuada cobertura, conservación e custodia dos medicamentos e produtos sanitarios.
3. Realizar unha dispensación responsable e eficiente dos ditos produtos.
4. Proporcionar información pertinente sobre a súa utilización e outras accións convenientes que fagan que a atención farmacoterapéutica sexa máis segura e racional, tanto dende o punto de vista asistencial como da saúde pública.
5. Facilitar o labor asistencial sanitario prestado aos residentes do centro, na prescrición de medicamentos e produtos sanitarios.

Terceira. Contido da prestación farmacoterapéutica

1. Para os efectos do presente convenio, e de conformidade coa guía farmacoterapéutica do centro hospitalario de referencia e coas directrices da Comisión Autonómica Central de Farmacia e Terapéutica e da Comisión de Farmacia e Terapéutica do centro, a prestación farmacoterapéutica comprenderá:

- a. Os medicamentos determinados no Anexo I deste convenio recollidos na Guía farmacoterapéutica de centros sociosanitarios do Servizo Galego de Saúde
- b. Os produtos dietoterápicos destinados á nutrición enteral para usos médicos especiais incluídos na Oferta de produtos dietéticos do Sistema Nacional de Saúde, así como os equipos destinados á administración da mesma.
- c. Os produtos sanitarios dispensables a través de receita oficial determinados no Anexo II deste convenio.
- d. Os dispositivos de administración de osíxeno, cánulas nasais e mascarillas faciais

2. Quedan excluídos o subministro dos gases medicinais e calquera outro produto non recollido nos anteditos anexos, tales como termómetros, guantes, material de aseo e limpeza ou cremas hidratantes.

3. Queda en todo caso excluído deste convenio calquera outro medicamento, produto ou dispositivo que non se contemple en cada momento na carteira de Servizos comúns de prestación farmacéutica e produtos dietéticos do Sistema Nacional de Saúde.

Cuarta. Persoa responsable do convenio

Para os efectos do presente convenio, designarase un farmacéutico dos centros asistenciais do Servizo Galego de Saúde, que actuará como responsable aos efectos de seguimento deste convenio. Este farmacéutico encargarse de asegurar a provisión de medicamentos, produtos sanitarios e dietoterápicos incluídos na prestación farmacéutica segundo os criterios do presente convenio e do seguimento farmacoterapéutico dos usuarios residentes no centro asinante, a través do Servizo de Farmacia do hospital de referencia do Servizo Galego de Saúde.

Así mesmo, a entidade DOMINIO DE BALBOA, SL, a través da RESIDENCIA XERIÁTRICA SAN COSME designará un responsable do convenio, a quen corresponderá a adopción das medidas necesarias para o correcto desenvolvemento dos acordos de prestación farmacoterapéutica recollidos no presente convenio, e a participación nas reunións e sesións de traballo aos que sexa convocado para tratar dos aspectos funcionais do mesmo.

Quinta. Obrigas do centro

A entidade DOMINIO DE BALBOA, SL, en consonancia co disposto no artigo 35 da Lei 5/1999, do 21 de maio, de ordenación farmacéutica comprométese ao seguinte:

1. Designar a un responsable operativo da xestión do convenio.
2. Dispor na RESIDENCIA XERIÁTRICA SAN COSME de espazo físico suficiente, coas medidas precisas para garantir a correcta almacenaxe, dispoñibilidade, accesibilidade, custodia e conservación dos medicamentos e produtos sanitarios incluídos no presente convenio de prestación farmacoterapéutica, e no que existirá o equipamento necesario para a conservación de medicamentos termolábiles,

armarios ou caixas de seguridade para a custodia de medicamentos estupefacientes e psicótopos, segundo a normativa de aplicación e, en particular, de acordo coas funcións atribuídas a tales depósitos polo artigo 35 da Lei 5/1999, do 21 de maio.

3. Adoptar as medidas necesarias para garantir a confidencialidade e privacidade do historial farmacoterapéutico dos residentes, de conformidade coa normativa vixente en materia de protección de datos de carácter persoal.
4. Dotar ao devandito centro do material e equipamento necesario para levar a cabo a dispensación individualizada por usuario residente, de xeito que se acade un seguimento integrado da terapéutica do paciente.
5. Utilizar axeitadamente os medicamentos e os produtos sanitarios subministrados polo Servizo Galego de Saúde, así como cumprir as súas instrucións de utilización e control.
6. Dispor de persoal técnico e/ou auxiliar idóneos para o desenvolvemento da prestación farmacéutica.
7. Contar con medios para o transporte de medicamentos e produtos sanitarios dende as unidades subministradoras. O transporte realizarase coa periodicidade que se estime oportuna.
8. O pagamento fronte ao Servizo Galego de Saúde das correspondentes prestacións, consonte ao establecido na cláusula undécima do presente convenio.
9. Informar puntualmente ao Servizo Galego de Saúde respecto dos usuarios ingresados na RESIDENCIA XERIÁTRICA SAN COSME que sexan destinatarios da prestación farmacéutica á que se refire este convenio.

Sexta. Obrigas da Administración

O Servizo Galego de Saúde, a través da Estrutura de Xestión Integrada de Ourense, comprométese a:

1. Realizar a planificación e organización da prestación farmacéutica aos usuarios residentes na RESIDENCIA XERIÁTRICA SAN COSME.
2. Proporcionar o soporte informático adecuado para levar a cabo a xestión do desenvolvemento da antedita prestación farmacéutica.

3. Subministrar, a través da supervisión do farmacéutico do Servizo Galego de Saúde responsable do seguimento:

a) Os medicamentos e produtos sanitarios incluídos no presente convenio, previa prescrición do facultativo do centro ou do propio Servizo Galego de Saúde.

b) Os produtos dietéticos destinados a nutrición enteral e equipos de administración que precisen os usuarios residentes no centro, que deberán axeitarse aos incluídos nas guías farmacoterapéuticas e de acordo co procedemento legalmente establecido.

c) Os produtos sanitarios incluídos na prestación farmacéutica que precisen os usuarios residentes no centro, sempre de conformidade coas Instrucións vixentes no Servizo Galego de Saúde e co catálogo de produtos da unidade subministradora.

Sétima. Atención Farmacéutica

O farmacéutico designado polo Servizo Galego de Saúde en colaboración co Servizo de Farmacia de Hospital realizará as seguintes funcións:

- a. Establecer a relación cualitativa e cuantitativa dos medicamentos e produtos sanitarios para a cobertura das necesidades farmacoterapéuticas dos usuarios residentes no centro nos termos previstos no presente convenio.
- b. Establecer as normas de acceso aos medicamentos e produtos sanitarios polo persoal previamente autorizado.
- c. Establecer un sistema de dispensación de medicamentos e produtos sanitarios que favoreza a atención farmacéutica individualizada por usuario residente, e permita o seguimento da historia farmacoterapéutica de cada un deles.
- d. Garantir a correcta conservación, dispoñibilidade e reposición dos medicamentos e produtos sanitarios no centro, así como o seguimento dun uso adecuado e eficiente dos mesmos.
- e. Colaborar no establecemento dun sistema de seguimento e control da utilización individualizada dos medicamentos e produtos sanitarios co fin de detectar os seus posibles efectos adversos e notificalos ao sistema de farmacovixilancia.

Oitava. Comisión de seguimento

1. Para o seguimento, control, e solución das dúbidas que se poidan derivar do presente convenio constituirase unha Comisión de seguimento, que se reunirá a petición de calquera das partes asinantes .

Esta comisión estará constituída por:

- Un representante da Estrutura de Xestión Integrada de Ourense que fará as veces de presidente.
- O farmacéutico responsable do Servizo de Farmacia do hospital de referencia ou o farmacéutico responsable da atención farmacéutica no centro que actuará como secretario.
- Un representante da entidade xestora do centro.
- O representante operativo do convenio no centro.

2. En caso de empate, o presidente da comisión terá o voto dirimente.

Novena. Persoal

A subscrición do presente convenio non implicará relación contractual ou de servizo entre o Servizo Galego de Saúde e as persoas ou profesionais que desenvolvan actividades que constitúan obxecto do mesmo.

Décima. Financiamento

A formalización do presente convenio non supón incremento de gasto para o Servizo Galego de Saúde.

Undécima. Achega do usuario na prestación farmacéutica

O importe da achega na prestación farmacéutica dos usuarios residentes nos centros sociosanitarios efectuarase de acordo aos criterios establecidos no artigo 102 do *Real Decreto Legislativo 1/2015, de 24 de julio, por el que se aprueba el texto refundido de la Ley de garantías y uso racional de los medicamentos y productos sanitarios*.

Neste caso, aos produtos incluídos na achega farmacéutica ambulatoria e dispensados dende os servizos de farmacia, de acordo coas correspondentes receitas/ordes de dispensación, lles serán aplicadas as porcentaxes e límites de achega dos usuarios fixados pola normativa vixente.

Mensualmente polo Servizo Galego de Saúde se lle facilitará á entidade titular da residencia o importe correspondente á dita achega, individualizada por cada un dos pacientes aos que se lles teña facilitada a medicación, comprometéndose a dita entidade ao ingreso do dito importe na conta que lle sexa indicada polo centro do Servizo Galego de Saúde.

A estes efectos, de conformidade co disposto no apartado F.1 do Anexo I, do Decreto 221/2012, do 31 de outubro, polo que se establecen as tarifas dos servizos sanitarios prestados nos centros dependentes do Servizo Galego de Saúde e nas fundacións públicas sanitarias, no caso dos produtos incluídos na prestación farmacéutica ambulatoria e dispensados desde os servizos de farmacia a residencias sociosanitarias, de acordo coas correspondentes receita/orde de dispensación, os importes da achega dos usuarios, fixados polo artigo 102 do *Real Decreto Legislativo 1/2015, de 24 de julio, por el que se aprueba el texto refundido de la Ley de garantías y uso racional de los medicamentos y productos sanitarios*, determinaranse tendo en conta o prezo de custo dos produtos dispensados.

Neste caso as residencias sociosanitarias que soliciten esta prestación quedarán obrigadas ao pagamento ao Servizo Galego de Saúde, sen prexuízo, de ser o caso, do procedemento que cada unha delas poida ter establecido para a repercusión do gasto aos usuarios beneficiarios.

Duodécima. Causas de resolución

Son causas de resolución do presente convenio:

1. O transcurso do prazo de vixencia do convenio sen se ter acordado a súa prórroga.
2. O acordo unánime de todos os asinantes, ou denuncia expresa de calquera das partes formulada con dous meses de antelación.
3. O incumprimento das obrigas e compromisos asumidos por parte dalgún dos asinantes.

Neste caso, calquera das partes poderá notificar á parte incumpridora un requirimento para que satisfaga nun determinado prazo as obrigas ou compromisos que se consideran incumpridos. Este requirimento será comunicado á Comisión de seguimento, vixilancia e control da execución do convenio.

4. Por decisión xudicial declaratoria da nulidade do convenio.

5. Por calquera outra causa distinta das anteriores prevista neste convenio ou nunha lei.

En razón do interese público, a Consellería de Sanidade poderá suspender a execución do presente convenio.

Décimo Terceira. Réxime Xurídico

O presente convenio ten natureza administrativa e, segundo o previsto no artigo 6.1, é un negocio xurídico excluído do ámbito de aplicación de Lei 9/2017, de 8 de novembro, de Contratos do Sector Público, pola que se transpoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014.

De conformidade co artigo 4 desa mesma norma, este convenio rexeráse polas súas normas especiais, aplicándose os principios desta Lei para resolver as dúbidas e lagoas que puidesen presentarse.

No seu defecto, as controversias serán competencia da xurisdición contencioso-administrativa.

Décimo Cuarta. Vixencia

O presente convenio terá vixencia de 4 anos, a contar dende o día seguinte ao da súa sinatura, podéndose prorrogar por períodos anuais mediante acordo expreso das partes, ata un máximo de 4 anos adicionais, de conformidade co disposto no artigo 49.h) da Lei 40/2015, do 1 de outubro, formalizado cun mes de antelación ao vencemento do prazo inicial ou de calquera das súas prórrogas.

Décimo quinta. Protección de datos de carácter persoal

As partes asinantes respectarán todas as disposicións previstas no Regulamento (UE) 2016/679 do Parlamento Europeo e do Consello de 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos); así como o resto de normativa vixente en materia de protección de datos de carácter persoal.

Décimo sexta. Rexistro de convenios, transparencia e bo goberno

A sinatura deste convenio de colaboración leva implícito o consentimento expreso das persoas intervenientes para que a Administración pública autonómica galega poida facer públicos os datos de carácter persoal que figuren nel, de acordo co disposto na Lei 19/2013, de 9 de decembro, de transparencia, acceso á información pública e bo goberno, e a Lei galega 1/2016, do 18 de xaneiro, de transparencia e bo goberno.

O presente convenio será obxecto de inscrición no Rexistro de Convenios da Xunta de Galicia, nos termos previstos no Decreto 126/2006, de 20 de xuño, polo que se regula o Rexistro de Convenios da Xunta de Galicia.

En proba de conformidade, asínase o presente convenio, en triplicado exemplar no lugar e data anteriormente indicado.

Pola consellería de Sanidade e
o Servizo Galego de Saúde

Por Dominio de Balboa, SL

Jesús Vázquez Almuiña

Lara Fidalgo Sánchez

ANEXO I

MEDICAMENTOS INCLUÍDOS NA PRESTACIÓN

Os medicamentos incluídos na prestación serán os medicamentos financiados polo Sistema Nacional de Saúde recollidos na Guía farmacoterapéutica de centros sociosanitarios do Servizo Galego de Saúde

No caso de prescricións para as que non existe equivalente dispoñible na guía farmacoterapéutica, a solicitude do medicamento tramitarase ao Servizo de farmacia do hospital de referencia achegando o facultativo médico responsable unha xustificación da necesidade de utilización.

ANEXO II

PRODUTOS SANITARIOS INCLUÍDOS NO CONVENIO:

Absorbentes de incontinencia urinaria

Sondas vesicais

Sonda nasogástrica

Sonda rectal

Bolsas de ouriños

Bolsas de colostomía

Tiras de glucemia

Gasas estériles individuais

Apósitos (os apósitos de cura húmida subministraranse conforme ás instrucións establecidas ao respecto no Servizo Galego de Saúde)

Vendaxes de protección

Venda elástica

Venda elástica adhesiva

Algodón

Esparadrapo hipoalerxénico e de tela

Cámara de inhalación adultos

